



青山集卷第十六

當塗郭

祥正字功父

五字古詩三十首

和穎叔遊浮丘觀

潭潭洞天門孰出朱明右突疑雲翼張竦見冰骨瘦
飛仙時往來別有通海竇此事僅傳聞世人豈能覩
歌簷榛棘合壞壁青紅舊汲泉鍊丹處頽毀無完甃
不逢博物人妙迹誰復究黃冠稟使拍乘時力營構
飛閣凌滄波誅林逐群狃松蘿翠欲滴蘭芷芬可嗅
秋蟾助餘魄蓬島分小岫披披宿藹散泠泠諸籟奏

超然俗念急揮手出宇宙况逢老集仙氣奪天下秀
落筆成千言霹靂震白晝於茲惜分携作惡須搵袖
穎叔招飲吳圃

五鼓開畫戟平明出重闈小橋分野徑吳圃會衆賓
番禺二月尾落花已無春唯有薔薇水衣襟四時薰
短垣乃浮丘樓觀何斬新我公發幽晦輸金走車輪
蓬萊飛一島雲物拖晴紳此景在眉睫圖繪未必勻
從來不彈弋傍砌鳥雀馴寄語北海若停風護松筠
負才詩傲敵縱酒吞湖漚酪酊安足辭不飲終成塵
逍遙一日事浮脆百年身何須跨黃鶴追彼瑤池人

但當聽公歌賣交并張陳達道齊生死筆端真有神
揮灑十八韻一一無價珍老彼杜工部玄哉揚子雲
鵠奔亭呈帥漕二公

新江自南來西與端江匯寒光入靈羊一碧浸羅帶
屹然鵠奔亭遺音溢千載羽儀莫可見窈窕想姝態
遭戕瘞同坎襦布久不壞訴冤如生平隱顯一何恠
讎人闔戶戮化質搏風快且將憂患辭浩蕩煙霄外
鳥飛并劍躍類與神靈會物變固難窮撫事增感槩周
侯昔行部羨績此尤最江生引爲言建平平捐罪宋
興跨唐虞乾坤正交泰皇華命俊哲枉橫無纖芥琳

琅斯亭篇證古欲陳戒殺人貴滅口覆族竟自敗姦
史誅既死潛德發幽晦堅珉可磨鐫榮光庶長在

端州逢故人劉暉光道致酒鵠奔亭作

貴池昔分袂端江復傾蓋屈指十六秋華髮驚老大
雲霄邈功名荆棘森患害衆人皆欲戮出門即有礙
上杜句吐哉不復道致酒強高會蒼梧帝魂寂鵠化
下孟句遺亭在翠葆櫻玉簪金鱗躍羅帶韓云江似青羅帶山如碧玉簪
風澄嵐靄散擢擊天影碎往古悉已空來今竟何待
勞形百年間投足萬里內秋水正弥漫醉膽逐澎湃
一絲携六鼇猛擲滄溟外

將歸三首

春田豈不羨春園亦可佳田水流泱泱園禽語啾啾
荷笠復携鋤動作頗自諧隣叟三五輩擊壤歡無涯
祿仕四十年志運良已乖許國既無補陷穽幾沈埋
皇恩湛昭洗印紱蒙優差內循齒髮衰愧彼英俊偕
休焉保其終飛章乞殘骸將歸樂復樂清風掃孤懷
結廬謝山下門荒蘿徑深寂無車馬跡而有猿鳥音
高峯落日盡遠壑歸雲沈死生一吾趣長嘯亡頭簪
勇往復此樂俛仰安可任垂老度庾嶺西江守端州
逾年忝祿食歸思忽驚秋結廬丹湖邊種木菓屢收

掛冠已不早玄花隨兩眸休休保殘齡擊壤歌皇猷
有兒集吏選餘事復何求回首天地恩瞑目終難酬

贈上藍晉禪師

泐潭月公晦其禪妙諸方傳之晉伯明獨步入豫章
一登上藍座日月回輝光問法瞻丈室方廣不可量
人人得甘露灌頂心清涼又通世俗書落筆皆文章
衆鳥難悉名卓然唯鳳凰羽儀下雲霄五色在山岡
先帝昔臨御京城開寶坊明詔求法才衆老爭低昂
惟師不妄念安之如太行乃知北遠師駕幸不下床
所傳信匪訛千載兩相望篁竹架清風喬松裊寒霜

回心剃鬚髮永願陪翱翔

望廬山懷陶淵明

羗廬初在望復憶柴桑翁醉來卧磐石悶默天地通
不入惠遠社自彈無絃桐悠悠出谷雲漠漠栖林風
倚巖片月白落磴寒泉洪此意非眺聽遙知與君同
追和韋應物廬山西澗瀑布下作

徘徊西澗下聽泉濯煩襟煩襟遂蕭爽妙音非世音
不知歧路絕貪翫煙蘿深斧斤未嘗入高材自成林
鶴鳴豈有怨雲去本無心寥寥陸簡寂古意難追尋

宿栖賢寺

遙憐李太白吟望瀑布水不知三峽流翠洒虛煙裏
雄聲雷雨驟遠響松風靡誰留千丈虹長在雲根倚
遂令車馬來朗瞻樓殿啓明明銀色界浩浩蟾波洗
居中梵天衆聞思悟玄理長老乃摩詰取供在彈指
普薰毛孔香真實超凡鄙病夫寄一榻清冷耀心耳
飄然睡魔去策杖中夜起不能跨鯨魚揮筆信非美

宿歸宗寺

曠懷王逸少宅地如翔鸞池水至今黑云是墨未乾
施作金仙宮樓殿排羽翰銀榜留飛鳥玉蜃吐鷲湍
耶舍寶塔近筆插青雲端貝葉五千書兩藏龍鱗蟠

鐘磬逝虛籟松杉扶歲寒護持不變滅鑪煙晝漫漫
暫遊寄僧榻條然心界寬愧無警絕章付與蒼崖刊

新昌吟寄穎叔待制

元祐丙寅冬新昌有狂寇名探其姓岑厥初善巫呪
南民欣尚鬼來者爭輻輳經年惑群衆詭術遂潛構
摧城止三闕作蜂唯撒豆竹竿變鎗旗銳兵莫吾鬪
此事古未聞造意無乃陋蚩蚩彼何知丁壯擁前後
長驅向城郭塵土翳白晝刺史亟閉門神理默垂祐
城頭無百兵坐待五羊救賊中衆所見戢戢羅甲冑
須臾薄音博寒陰凍立多僵仆平明若鳥散賊本未遑

究權帥計倉卒遣將速誅蹂貪功恣殺戮原野民血
溜嬰兒與婦女屠割僅遺脰傳報及南昌新帥若煙
走穎叔至洪聞賊報即星馳度嶺入境亟止殺渠惡

用機購逾旬果獲探胥斬餘悉宥朝廷方好仁帥略

寔能副臺章請褒賞詔語優以懋撫綏聊借才侍從

尔來復身居江湖上名近日月右記上略制麟兒隨

飛龍戊辰季嗣陰隲資貴富彼羨南山松亭亭千丈

秀終為廊廟器未許連城售吳毛持漕節文彩爛錦

繡發為新昌行洪鍾待誰扣我將磨蒼珉為公悉鏡

鏤運判吳翼道毛正仲皆作此詩見帥賦之並刻石立於新昌之使聽

送許栖默道士

結廬守親塚淡食畢喪制焚香誦寶經傾悲拔冥滯
神明扶孝思肌髮保陽氣支離僅不死隣里為歔歛
倏然叩子門躬勤謝銘誌袖携一幅圖离坎備形勢
明堂正丘穴松檟列新翠身雖離塚傍披圖即流涕
拏舟遽言別諱日仲春至酌水採嘉蔬藉草具嚴祭
又言廣栽植薄取歲時利事死如事生終焉達斯志
儒者似君稀况復褐冠類誰為孝子傳吾詩信無偽

送胡推官赴無錫丞

愛山不離山君來訪山間山間只欠水聽君語潺潺

滋我山色秀洗我塵心煩如何遽言別鸞驂欲翩翻
試才得佳邑割鷄鳴刀鏤雙親尚未老伯氏趨朝班
藍田玉一雙浮出濡湏灣天作王者瑞寧獨名鄉關
自憐困已甚風流邈難攀新詩儻許寄秋鴈無空還
送胡與幾被召赴闕

嗟我老已疲掛冠歸舊廬素乏二頃田無可把犁鋤
窮年小山下獨伴千卷書作止隨古人襟懷稍欣如
又無樽中酒能延故人車感君數相過氣豁眉宇踈
天馬出月窟回薄萬里餘其才無不且祿仕猶拘拘
忽聞明庭詔一節馳輕輿往必陟臺省公言壯皇圖

潛心救世弊肯意爲身謨法密吏愈偷食衆財益虛
末大本漸弱豈在專防胡指瑕一二人此事尤可吁
細碎何足論網舉網不逾譬彼脉已病其身尚膏腴
要當速內究玆丸應時湏良鑿望數公潤澤回焦枯
願如范文正挺特真丈夫老死見太平委棄甘路衢

送馬東玉朝散還臺

秋空若明鏡雲物瑩可數臨高送遠發况復瞰牛渚
崔嵬水帝宮半出燃犀浦橋基插波瀾王氣逐龍虎
歸艤豈能留兩漿幾欲舞重光瞻舜日群材入天罟
聃聃馬東玉松栢奈寒暑五載佐吾邦大匠善規矩

仁民而愛物巨細各有補宴閑集賓朋風流照樽俎
能詩又敏速往往造險語文章久薦達名聲動寰宇
肯中蟠虹蜺行矣須一吐伊予百無堪投老尚好古
垂竿魚未食茹檠口忘苦唯君最相知稱謂等鮑庾
君歸我何適形影守溪澣時寄一行書焦枯望霖雨

謝涇川宋宰惠近詩

不到涇上邑倏忽二十載環山敞樓閣金碧想未改
長溪拖翠玉洗月發光彩秋聲咽松杉夜氣馥蘭茝
白鳥自成群黃猿行作隊仙人控鯉去巖下遺蹤在
猶疑深雲中彈琴尚相待唐儒工翰墨石壁露璨璀

意有神明憐塵蘚不得浼地勝來俊哲宋子今出宰
公餘綴吟筆爛熳排珠琲又如崆峒兵百萬森甲鎧
寄我數十篇脩然起沉痾肯中強搜抉舊學久荒餒
欲追天馬蹤騫蹶竟難逮撫卷懷昔遊魂魄飛黥黷
何當裂雲牋看君吐江海

寄杭州天竺辯才大師

我聞辯才師解空稱第一病子得摩頂其疾頓若失
救物運真悲了心非幻術聲名動寰宇退身愈藏密
峩峩龍井峯篔簹竹不透日終朝無來賓筇枝自橫腓
此道何寥寥差肩佛摩詰無生無不生一以貫禪律

安得兩羽翰歸飛參丈室稽首慕高風天地相終畢
送外甥法真一師

仕祿不及養勇往學金僊棄家如脫屣壞衣披稻田
見汝若見母令我涕泗漣我方齟齬時巨嶽遭摧巔
汝母挈我往西江赴臨川愛育比其兒衣食無頗偏
追隨二三載思親我言還是時汝未產顧今三十年
汝壯我已老死者歸重泉悠悠記昨夢幻妄真可憐
汝能逃世界累趣尚固已賢京華勿久棲還當擇深淵
返窮生死本勿爲言句纏拭我衣上淚贈汝金石篇

送甥沈濟秀才下第南歸

炎風吹黃塵去興不可止丈夫固有命得失致悲喜
何當永相將錫山酌泉水

送胡子企大夫還臺

聯鑣出梅山倏然二十載君嘗佐天府我遂泛雲海
音書魚鴈絕夢寐想風采營車忽來過笑語珠璀璨
故交悉相忘而君獨不改天王堯舜資化柄付良宰
網羅收鴻鵠臺閣茂蘭茝君歸必殊顯發策救民痍
形容入凌煙丹青永無浼使我觀太平白首甘凍餒
投宿繁昌徐氏水閣

東池種蓮子西池養肥魚盈缸釀美酒滿盤具新蔬

客來徑一醉疑是桃源圖此事未足議弟兄皆業儒
大弟已登科高名動鄉閭季弟復連薦豹變應時須
長兄恬自養雲卧隨卷舒物至我則應隱德良有餘
客有醉吟叟六月騎蹇驢避暑尋名山遂登君子居
飲弄池上月一宿能清虛相看不相厭欲去且踟躕

和姜伯輝見贈醉吟畫詩

蒼崖一萬丈中瀉白玉泉飛鳥度不得而我長攀緣
洗盡心地垢吟成元化篇更復有何物一樽當我前
忽逢姜伯輝爽量涵水淵開談了無迹所得全於天
便欲脫青衫泛我江東舡結交要終始相忘復頽然

徑呼妙手畫秋江霜景全冰輪正卓午照影無頗偏
誰能騎蹇驢世路空留連吐哉可以往揮手從飛仙

觀唐植夫所藏古墨

黑龍蟠黑雲久蟄黃金闕緣何落人間數餅若古月
蝦蟆不敢蝕利刀詎能截溫潤北方玉芬香麝臍裂
乃知廷生名栢栢久不滅植夫名世後彥範所畜號
竒絕護以紫錦囊篋之復高鏑渺思五季亂江南頗
偷逸三主皆能書撥鐙聳瘦骨一朝歸大明流散餘
故物金華座石銘清涼自題佛二寶藏予家時時一
披拂及觀植夫天墨清風愈飄忽異國想塵勞精靈豈

沈沒聊爲識古篇分手各蕭瑟

酬富仲容朝散見贈因以送之

牧之吟齊山太白詠秋浦至今三百年光焰不埋土
我朝文愈盛往往出前古仲容生相門璨然鳳凰羽
作鎮簿書閑盈編金玉吐牧之何足論白也真尔汝
一朝解符歸暫泊采江滸肩輿過蓬華高談辰及午
洗我塵坳聽不覺歡欲舞又如熟黃梁連食釋飢苦
昔聞鄭國公片言戢狂虜廟食配神宗昭昭仲山甫
今逢族弟賢家法中規矩郎省寧淹回往自結明主
不唯唐蕭家繼踵登相府請驅千里雲時作三日雨

宿鍾山贈泉禪師

夜半松栢響繞巖鸞鳳音披衣送遐眄明月方庭深
樓殿遍瑤層寶塔棲中岑定分付刀赤世故仍癡淫
六朝遺破塚四聖崇幽林香厨飯玉粒千歲聞于今
况逢大道師妙傳諸佛心其徒五百人坐忘靜沉沉
寶光泳琉璃永無塵垢侵何以明歸仰頓首興微吟

送倪悴敦復往池州決獄

忽領外臺檄離家不辭艱破雪陟遠道侵星出重關
提刀聊四顧決獄談笑間且經五峯寺遂登九華山
朗飲雲泉秀妙依松石閑琳琅如得句先寄南風還

送敦復至觀音寺再用前韻祝別


大道既如砥安輿寧險艱通溝水泱泱出林鳥關關
紫詔下天外黃氣生眉間歸當趨玉陛豈容眷名山
接物齊彼分存誠肅吾閑我心如路草願君與春還

陶然軒呈孔掾

我醉不在酒心常醉於天出處無固必四時任陶然
世網誰拘拘冥鴻自翩翩隱几樂吾樂陶然名此軒
採掇富菊杞芬香藉蘭茝啼鳥助春喜相呼語涓涓
好風集清微時寫朱絲絃秋月瑩池上臘雪堆簷前
客來亦把酒客去還醉眠爲君發短調意將千載傳

青山集卷第十六

青山集卷第十七



當塗郭

祥正字功父



五字古詩三十首

安中尚書見招同諸公登雨華臺

城南五里近驅車稍停休層臺臨古刹欣陪清淨遊
 凭高送遠目考古思名流更讀琳琅篇叙事何其周
 尸黎與法雲接跡居崑幽趣將金僊諧行匪邪徑由
 至今手植松千丈騰龍虯悟發特異眾妙齡已依劉
 天華無根蒂應講來飛浮帝釋昔舉手此理誰可侔
 迩來表前蹤新亭歷黿頭空渚栖古月大江浴清秋

曠懷出十地壯氣橫九州三山連天門水府卧金牛
故國羅綺滅深宮榛莽留興亡千歲間愁緒如縲抽
惟餘北嶺雲無心自悠悠高鴻正飛冥羅網安得收
公等真丈夫問學皆淵丘不應持使旌歸合登瀛洲
栢栢鼎鼐司落落金馬儔君臣若堯舜明良互賡酬
胡為慕瞿聃玄微解而優願舒三日霖慰此旱歲求
乾坤涵潤澤使我醒兩眸吐嗟勿重陳玉樹後庭謳

送李嘉甫朝散還臺

春風連作惡吹雪深尺五元宵無燈火閉關與誰語
忽聞營從過傾蓋挹眉宇相親如故人坐久加循撫

蓬茅只數間餘無一丘土半俸足以飽未嘗詣州府
白雲寓遠目清溪照靈腑趨閑已忘憂浩歌惟汲古
明公志方壯富貴行可取協韻高才孰能當如羆亦如
虎致君為唐虞澤民作霖雨功名垂乾坤兒孫列簪
組於予一何遼而能強相與聊書送行章欲以明出
處

前春雪

玄冥奪春令連旬雪塞屋嗷嗷何物聲云是饑民哭
來請義倉米奈何以空腹寒威如戈矛命盡須吏速
憶昨去年水雲濤卷平陸高村既無麥低田又無穀

民間已乏食租稅仍未足縣令欲逃責催科峻鞭扑
嗟哉吾邦民何以保骨肉昂頭訴蒼蒼和氣待春育
春工本好生此雪無乃酷誰家敞園館草樹變瓊玉
美人學回風歡笑列燈燭不知萬戶寒唯憂五更促
世無採詩官悲歌寄鴻鵠

後春雪

前雪深尺五後雪深五尺動地北風惡連天凍雲塞
通達絕行人萬物同一色燭龍爪生冰陽鳥背插翼
牛羊何足論虎豹餓無食此雪昔未有父老均嘆息
况當長養時玄冥翻怒赫我欲請雷車夜半轟霹靂

斗杓斡春陽和氣隨甲拆溶爲大田水青發壠頭變
南民少蘇醒白骨免堆積朝廷方體仁乾坤應合德
有酒不敢飲獨樂神所責悲歌閉空屋寫慰同心客

送黃吉老察院

積學久未遇忠言今可施請君略細故吐出肯中竒
悉救當世弊自結明主知不唯振憲綱進當司鼎彝
用廣財已乏官冗人愈卑政寬法不舉將悞邊無威
家家侈聲樂淳源變澆漓土木絢金碧佛仙競新祠
此乃心腹疾豈止爲瘡痍言者曾未及雖言多恚私
苟非大姦邪惡足求瑕玼舉朝無完人何以裨明時

嘗讀喜似篇左右皆宜之乃知荆山璧天地終不遺
去聖無變容誠明達神祇我方卧巖谷所友鹿與麋
感君營從過枯木春風吹又如得黃梁慰我久苦飢
承認不敢留歡言遽睽違殷勤何以報報君以無辭

和敦復留題池州弄水亭

我寄江南隱數為弄水遊讀君弄水篇感旣攀巢由
赤脚踏雲雨投竿翫汀洲鷗鳥不見猜飛舞相應詎
誰傾百斛珠跳躑無復收一發海客祕爛副貧家求
李杜縮光焰王謝慙風流開卷起予興飄欲乘桴浮
如觀秋浦圖晚景入兩眸愛之不能捨飢魚適吞鈎

嘗置几案間出沒窺崑幽一別幾何時歲月已十周
跡滯若匣劍繡澁不可抽何當隨君車吟哦與君侔

謝胡丞寄錫泉十瓶

怜我酷嗜茗遠分名山泉茲山固多錫泉味甘尤偏
幸遇佳客便十缸附輕船開缸漱清冷不待同茗煎
想君民事休時時造泉邊入碾龍鳳碎浮甌乳花圓
一啜未能止七盃誇玉川兩腋生清風飛逐蓬萊仙
江心與谷簾校之孰為妍欲報吾子惠仍思陸生賢

謝魏戶曹惠酒

官醪不許買兵醞未嘗得愁殺避俗翁甘為獨醒客

緣何魏夫子仁心生憫惻雙壺輒分送涸鱗被甘澤
鐺杓再施設併欲醉君德百川供長虹叱咤天地窄
儘從秋來水大笑問河伯胡爲辨牛馬灑灑浮月魄

川漲

朱夏久不雨川源倏然漲三湖渺相連狂風蹴高浪
蛟龍逝出沒魚鼈隨浩蕩群山悄低徊阡陌失背向
嗟嗟圩中田一埂安可障去年已大潦十戶九凋喪
幸賴官廩實顛顛命所仰官廩今已空農事未敢望
理水竟無術祈禱俟靈貺退寸復進赤潮勢頗難量
彼蒼罪斯民殺戮不以杖令人思禹功巍巍百王上

荅魏掾招飲

我欲招魏子小山嘗白醪月華雖未滿已覺秋風高
何物佐樽酌肥鱸并蟹螯一飲洗百憂軒冕稍可逃
此語未及發辱君先見要乃知志趣同盍簪皆俊僚
亦應喚舞娥紅雲欲飛飄不然避謗傷淡話傾漁樵
期歸一酌酹世事如芭蕉

酬彭法曹留題小山用次來韻

讀君小山詩語勢欲飛舞乃知甘與賈年少心則古
又如東方生用之必爲虎予方坐空谷屏息避煩暑
開緘揖清風不覺生毛羽携之出人間瑤池贈王母

送黃彥發還臺

予方寓小山感君忽相過風標奪瑩玉氣語排懸河
君初佩金印治蠻真有科彼侮我即斬威行濟之和
使知朝廷尊帖帖無愆訛聖主方求才四海張網羅
麒麟并鳳凰所獲寧爲多如君必見收爲君吟菁莪
酬陳掾留題小山二首用次來韻

我愛小山石翩翩鸞鳳姿胡爲不飛去似與幽人期
志澤未及物收身聊自嘻不教三徑荒寧歌五噫詞
舊交安在哉歲晏逢子知躬勤結惠好琅玕分一枝
茲山何亭亭鬱有高人姿朝容白雲過夜與明月期

幽蘭翠碧秀好鳥鳴聲嬉更逢佳客來惠好留美詞
遂令一丘樂能垂千載知躬勤謝陳子蒹葭倚瓊枝
和陳掾効陶齋

君欲効陶潛超然異今趣開齋即吾廬欣欣同所慕
潛魚不群游栖鳥不返顧無意亦無我何思復何慮
遂趨羲皇上日夕自休裕百年能幾何不知歲云暮
終當隨白雲悠悠此山去

喜鍾山泉禪師見過

聞師飛錫來七日遠葷飲欣諧清淨談中夜未能寢
師提寶公刀爲我裁古錦言歸不須忙溪上冰雪凜

送魏掾赴調

齟齬已承祿資賦况超邁三年瑩無疵一日忻有代
芳洲清風微夕浦寒煙霽翩翩莫能留逡巡遠山外
浮生離合際志士懷耿介渺思歲月往俯眎天壤隘
人驚甘羅少帝憶賈生對竟言若為期充實光輝大

送喻明仲朝請還臺

出馳使者星歲月一何久巨航始北歸華髮已盈首
讀書過五車滿腹藏瓊玖行行赴金闕朝帝見太母
乾坤運元氣斟酌須北斗願如范文正上疏發續黠
明明納忠諫聖作古無有道行且寄書慰我窮老叟

送倪敦復朝奉還臺

有力乃致遠中道力不任言歸閉空屋敢復求知音
君來監郡務猥巷一見臨稱褻借陽春片礫成寸金
觴酌每追隨嘯詠舒襟襟不覺三歲過啓櫂離江南
韻協君懷有玉寶未嘗獻于今于今不往獻千載惜湮
沈流景良可悲鬢雪來侵侵前途漸就窄後會安可
尋屋梁見落月躬憂存我心猶期澤萬物霈然作商
霖

邀敦復小酌為別

三年同賞梅梅花爛晴雪一日言北歸梅黃雨初歇

誰將金彈丸綴在綠枝上結實勝開花邀君更同賞
食梅齒牙軟銜盃奈離憂過江桃李熟回首憶梅不

送楊鎮供備還京

伯玉弘農侯頗頗真丈夫首雖峩武弁滿腹藏詩書
三年監郡兵一日六解符考之間井言公廉卒如初
未嘗害一物縱捨乃有餘我方卧空屋坦跣與世踈
感君數相過晨坐定及晡新詩并美酒問遺無時無
老境重可惜遠別復何如羨君五福全客官奚拘拘
子孫既祿仕京城富園閭精神趨強健優游早懸車
祝君可以歸為君吟歸歎

聽惠守錢承議談羅浮山因以贈之

久憶觀滄海喜君語羅浮浮從會稽來與羅相獻酬
誰欲通兩山鐵橋跨山頭笙簫響瑤臺佛仙栖石樓
靈光燭商舶七星被林幽飛泉難恙名異草香氣柔
危峯聚白鹿深塢眠青牛葛洪安期生遺蹤尚綢繆
攀巔瞰海水湛碧纜一甌不見波濤翻颶風駕龍虬
又云朱明天飄然落遐陬方廣吞五嶽盤紆臨十洲
不得預封禪自起煙雲羞此理固莫測勝境輸君遊
君語洗我耳我詩瑩君眸羅浮杳何許為我商聲謳

送錢節七承議還臺

平昔未識面已景才業殊及來公誦家把酒情忻如
分携八換歲益聞峻名譽我方姑熟隱君解惠國符
鷁舟始云泊駕言過茅廬傾談洗塵聽積憂令我舒
鳳窠無凡毛龍窟多美珠朝家正清明往矣涉亨衢
澤民異姚宋致主優唐虞史筆採循吏非君復誰書

自釋二首

去日不可追來日已無多衰頹復自念遷謝當奈何
賢達并賤愚百歲同消磨不如詠觴酌徘徊眄庭柯
流翠自成幄好風時經過憎愛理兼忘虛淡神所和
運盡即隨盡葬并骨南山坡

遭時如堯舜擊壤歡且歌歸田尚叨祿天寵固已多
敢復邀長年寓景隨流波有酒即觴酌風日眷清和
俯悲秦晉士含飢避干戈

懷友二首

夕陽在牕戶涼氣何處來微風泛庭柯蕭蕭歷空階
抱琴一寫之冰霜濺孤懷但惜對樽酌而無良友偕
聊將幽獨思滔滔寄長淮

晚坐庭樹下涼颼經我懷亦有樽中物佳人殊未來
佳人隔重城誰復爲之儕瞻雲雲行天步月月滿階
想聞誦聲作崩騰瀉江淮

七月八日要閣公達承議晚酌二首

河橋散靈鵲曜景逾佳期池華延舒月尚可傾一卮
欲以要良賓秋事言淒其歲往豈再得綠髮含霜滋
寓意不在飲營駕君莫辭

營駕君莫辭寓飲不在酒得酒亦可喜話情庶延久
鷺白不翳塵山光含羨璞霞綺映池葩條蟬嘶露渥
時平無橫去愁身退茲餘裕彈琴來薰風高軒良可
佇

嚴氏西齋

立屋聚群經執經授諸兒趨善務深畜言行韜前規

譬欲種嘉禾春膏力鋤犁一朝秀而實刈熟當如坻
遂為道德飽用濟斯民飢庭木豈不美涼陰奉邀嬉
池水豈不深濯熱臨清漪作止既可樂左右皆宜之
瑤琴誰為彈倚聲奏吾詩

青山集卷第十七

青山集卷第十八

當塗郭

祥正字功父

五七字古詩三十首

志士吟二首

郡材欣向榮志士寂無託獨鳥千里飛天末孤雲泊
 越女殊西子秦聲異別鶴守貞不辭貧怡怡內常樂
 高歌戛金玉其聲震寥廓歲華忽已晚志士將奈何
 摧車眷前脩渟澤無餘波知命守窮賤脫屣南山阿
 出從麋鹿游坐與猿鳥歌采菊復采薇聊以養天和

聞砧

天潢轉斜白庭菊汎團露紈扇辭玉織雲幄含幽素
濕螢遍踈牖寒蜚鳴外戶南鄰發砧響涼夕敢虛度
不作舞衣裳爲君理繒絮邊磧多苦寒先秋寄征戍

秋扇

輕素裁團扇投君掌握中爲君却煩暑動搖挹涼風
一朝霜飈至羅幃衾被重辭君且屏跡棄置隨斷蓬
物理古如此用捨安可窮願君千萬壽執執還相逢

庭竹

眷此庭中竹羅生橫十尋踈踈挺高節密密敷清陰
好風每相過流塵詎能侵其下無蔓草其傍遠脩林

結根自得所非高亦非深誰復採笙簫玉宇思和音

賞蓮

濯濯水中華香艷勝蘋藻英英泥中根絜素常自保
房實又堪食無一不爲好乃知金仙經譬諭肆論討
遊焉集賓僚賞詠固宜早一朝霜飈至莖葉變枯槁
抑亦如佳人妍媚忽衰老顧眄豈復憐棄置不足道
幽懷向君開芳樽爲傾倒木末誰能塞愁煙起孤島

將至金陵謁曾子開侍郎

秋空久不雨漠漠風卷沙胡爲起高興昨夜辭山家
明投金陵郭府觀凌紫霞公解豫章榻我停銀漢槎

一傾別後言電雹鳴交加借公口中春發我枝上花
又如出地雷空山走龍蛇公能結明主我亦思無邪
但驚歧路別進退各有涯浮生能幾時鬢髮忽已華
會合豈易得兵厨酒仍佳慎勿學謝安捫涕空感嗟

雙泉軒贈太平守梁正叔

開池得雙泉因泉構華屋池中種菱苻池上列花竹
與春蘸新紅遇風搖淨綠輕鷗自飛舞纖鱗隨出縮
操舟往江海端憂龍蜃觸卷衣入山林而防虎狼欲
豈如一凭欄俯仰快心目朝吟吟有餘暮醉醉不足
雙泉長涓涓比公享天祿公歸民懷公聽我雙泉曲

徐子美楊君倚李元翰小酌言舊

南方多苦熱北地尤苦寒徐子掾昭宜七載濱夷蠻
楊李仕并代毳裘霜雪殘一朝相續歸相看涕汎瀾
捫涕喚家僮草草羅杯盤念昔共庠序垂髫競癡頑
及今過六十各各嗟衰顏光陰信如馳生死無百年
妻兒半凋喪少喜多憂患吾方慕陶潛行歌眷南山
山氣日夕佳吾廬未嘗關猿鳥相與居絲桐時一彈
三子方急祿遑遑未能閑努力佐州縣須防官長難
暫當陪我醉餘事不足言

寄題九江陶子駿佚老堂

未老已先佚構堂名佚老與其寵辱驚何似歸來早
淵明乃吾祖此道能自保歸來無一事時時為酒惱
紙帳春氣融不寐聽春鳥關關技上語報我竹間曉
我醉未能起尔音一何好却笑世間人忘憂種萱草

復雪

連朝雪復雪吾獨擁紅爐樽中亦有酒不為飢寒驅
目前奚所憂所憂在村墟去年旱兼水二稅多逃逋
十家九乏食往往死路衢空山嗥虎豹深淵卧龍魚
飛鳥各斂翼廣莊斷行車倚門獨悲謔陽氣何時舒
將至壽陽謁朱行中龍圖作

魏臺公送我春風花落盡壽陽我訪公蕭蕭朔風緊
且復念殘年鬢髮安得鬢高才以外補惠愛益不泯
聊歌古柏行歌罷仰天哂長淮白魚肥冰壺酒堪引
暮春之月謁廬守陳元輿待制作

百年憫秋霜念念流運歇一昨辭周行於今鬢垂雪
幽獨誰為扶寸心徒自折翻然駕柴車賓閣重欵謁
與公論襟期及此陽春月英英欄中花滋露正妍發
濁濁瓮中醪浮醅想芬列朝廷用直道郡邑罕所闕
嫵婉我之友皎若環與玦良辰不同樂衰暮空惜別

廬陵樂府十首

妾搗纖纖手一拂白玉琴琴聲寫三疊寄妾萬里心
朱絃斷可續妾心常不足纔驚楓葉丹又見楊枝綠
望君君未到妾兒寧長好雲鬢懶重梳從教似秋草
鴻鴈殊未來思君一彈琴泠泠別鶴語折盡幽蘭心
蛛絲漫相續難繫驂騑足白日無時停雲鬢寧長綠
年華要不老不若丹青好對之雖無言猶勝種萱草
與子初執手効彼瑟與琴子去既不返誰復知我心
寶刀能切玉願斷金烏足留住枝上春花紅葉長綠
懊惱復懊惱憔悴變妍好不見庭中蘭埋沒隨百草
妾身厭塵埃專心託君子感君一面眄涸轍逢秋水

雍容未經年結誓同生死胡爲忽言別短書無一紙
愁思魂夢飛鵲語不成喜歲晚君不來紅粧爲君洗
嵯峨姑射山綽約飛行子絳唇啓皓玉明眸漾寒水
方平與麻姑相期永不死手披黃庭經金字寫青紙
胡爲謫人間離合溢悲喜妖桃凝露珠東風任吹洗
庭下幽花冪寒霧金鴨冷煙無一縷從君別妾駕紅
鸞望斷三山無覓處平時曲調休重舉長袖空垂不
成舞醒眼牽愁送春去獨立殘陽與誰語
英英玉山禾乃是鳳凰食鳳凰殊未來禾生亦何益
幽香眷眷春盡孤根含露寂委棄同蒿萊吐嗟人莫識

自君之往矣幽房守歲華
眉頭勻翠淡裙帶縷金斜
魂魄空成夢音書不到家
憑誰度庾嶺和淚寄梅花
粉黛元知假丹青豈是真
桃花初過雨溪水暗流春
眼眼隨雲斷書書託鴈頻
漁郎自迷路狂殺武陵人
不作巫山雨螺川久住家
欲知冰未釋須信玉無瑕
對局拈棊子開窻摘杏花
誰能諳此意紅日又西斜

妾薄命

雌鳳始營巢妖桃半敷萼
憶昔嫁君時相逢一何樂
朱顏妾未變白眼君先惡
君恩不下濟妾意正難託
空床春寂寥孤燈夜蕭索
哀絃時一彈彈終淚還落

怨別二首

渡江君別妾恨不如桃葉
桃葉解隨君渡江不用楫
妾旣不得隨渡江楫如飛
自憐妾命薄江頭還獨歸
一步一回首碧雲凝落暉
空將盈掬淚和粉洒羅衣

古詩云桃葉復桃葉渡江不用楫

團扇不遮面欲君永相見
胡爲忽別妾舩逐南風便
君行妾獨處妾復誰爲主
正似晚春花零落隨風雨
有情頻寄書莫令書更踈
却羨路傍草到處逢君車

古詩云團扇復團扇團扇遮人面相見不得親不如不相見

代古相思

妾面如花開妾心似蘭死花開色易衰蘭死香不已
願持枯蘭心終焉託君子君行胡不歸兩見秋風起
鴻鴈只空來音書無一紙夜夜夢見君朝朝懶梳洗
不憶霜月前絲桐爲君理千古萬古悲悠揚逐流水

擬桃花歌

酣酣桃始花灼灼粉面笑粉色射花光奪盡丹青妙
藍衫馬上郎風流亦年少語言雖未通精誠默相照
斂容緩步復掩門只見桃花不見人輕紅淺白正含
露欲落半開將送春凝心駐馬日漸晚隱忍時時下
前坂回頭又不見桃花唯有青山遮醉眼揚鞭擊鐙

歌團扇相見不如不相見逢人寄語問桃花春殘吹
洗落誰家

怡軒吟贈番禺張孝子

古云蜀道難蜀道之難難於上青天孝子尋親不辭
遠草躋負米離番川西從荊州望夔國捫蘿躡石穿
林巔峽山愈深人迹絕但聞悲風冷澗聲潺湲汲溪
鑛火行復冷夜宿茅屋衣裳單回首江南路九千一
見歸客吞悲酸寄聲吾母形骸安慎勿爲語皮皴乾
涪州城西遇征蠻城門防盜白晝關撫膺仰天涕洟
瀾見親之難難於蜀道難成都漸近心稍寬踴躍可

得瞻耆顏父昔離家子方孕子得見父今壯年胡弗
歸兮死敢請慰我慈母心懸懸三往三返又十載孝
子執轡方言還番人聞歸競嗟喜夫婦白首重團圓
誅茅立屋奉甘旨陳侯篆榜名怡軒春禽啼壺助春
飲綵衣自舞春風前罽金饌玉非我欲但願眉壽雙
松堅朝熙熙暮熙熙誰將朱絲繩奏我怡軒詩

憶劭亭山作

忽憶劭亭山翠碧千萬尋白雲拂地弄晴影黃猿嘯
晚清人心桃花流水三月深柳絮披煙辭故林重樓
複殿据山脚像塑制度祠非淫晉時謝守曾賽雨至
今石上鐫遺吟五言雅重叅二典琅琅一誦鏗璆琳
綠潭無底白玉沈千載何人知此音李白騎鯨出滄
海回鞭曾宿岵嶢岑却泛虛舟弄溪月紫霞之杯傾不
歇醉來更約崔宗之秋水玄談清興發數公逸駕何
當還悵望英風不可攀信道相看兩不厭古來只有
劭亭山

青山集卷第十八

青山集卷第十九

當塗郭

祥正字功父

古律哀挽三十首

神宗皇帝挽詞二首

物物皆成化熙熙十九春壽觴方奏樂法座忽流塵
 遺治前無古稱宗孰有神煙霄歧路別百辟共沾巾
 原廟工初畢神遊竟不還鼎湖龍馭遠湘岸竹枝班
 謚號尊逾聖陵基別有山陵去諸陵三十餘里九重春忽暝四
 海慘愁顏

王丞相荆公挽詞二首

間世君臣會中天日月圓裕陵龍始蟄鍾阜鶴隨企
畜德何人紹成書闔國傳回頭盡陳迹麟石卧孤煙
公在神明聚公亡泰華傾文章千古重富貴一豪輕
若聖丘非敢猶龍耳強名悲風白門路啼血送銘旌

哭梅直講聖俞

生事念死隔歛如過鳥飛長空不留迹清叫竟何之
死者固已矣生者謾相思昭亭雪塞止相遇忘寒飢
解劍貰濁酒果餽躬自携掃除長少分曠蕩文章期
贈蒙以太白自謂無復疑及將起草茅謹札還先馳
邀我采石渡爛醉霜蟹肥沉吟望夫曲朗詠天門詩

險絕必使和凡魚豈龍追篇篇被許可當友不當師

予嘗以師禮見聖俞聖俞不予當也

凌晨掛高帆公行我言歸一別三四

秋音問山中稀去年集選曹僮瘦馬力羸訪公國東
門問我來何時青芻與白飯諸子爭賣持論新復談
故謂我今逾竒南還得長篇萬里銜光輝此德未云
報仆音裂肝脾栢栢萬人英不遇終愁羈一官止太
學薄命吁可悲所嗟吾道喪斯文竟何爲譬彼卞子
玉棄置汙濁泥鳳來無嘉禾啄肉紛群鴟彼蒼厥有
主此理安無欺嗚呼如之何酸嘶復酸嘶

哭夏寺丞公酉

齊山鬱愁煙鏡潭墜孤月佳人去不還生別成死別
有才曾未施負冤終莫雪世情多返覆美玉不如鐵
無路攀魂車隔江寄清血

哭子點

五歲養育恩一朝隨埃塵琅琅讀書聲在耳猶如新
哽哽臨絕言喚爺眉屢顰永痛卑栖邑醫脉非良真
微疾遽夭殤吾家失麒麟嗥天天莫知拊地地不聞
淚迸睛欲枯腸斷臯愈辛汝卧長夜臺我孤大夢身
後嗣復誰望有車已摧輪佳鷄墮危巢異芳零短春
黃泉無白日青塚多愁雲哀絃寫悲歌吊汝冥漠魂

哭宗叔致政大將軍

文鋒困挫離場屋武略縱橫動冕旒國士傳家雖有
子將軍終老不封侯抱冰末路垂三紀埋玉空山第
一秋餘派江東藉雲蔭載瞻遺像涕交流

故臨川太守石公挽詞二首

憶昔江頭別悲歡失後期姦言誣直節枉獄累明時
白玉元無玷青天孰可欺有兒能雪耻泉壤釋餘悲
半道逢豺虎吞聲力已窮命從冤獄喪言有諫臣公
玉樹埋長夜金魚委斷蓬旅魂雖獲雪千載起悲風

陳伯育承事挽詞二首

海鶴冰為骨霜潭月作心要賓唯飲酒焚券不論金

公因二子登第盡召鄉人素負公金者合飲折券二千餘緡相望縈離恨何嗟得計音

春回墳草綠誰伴夜臺吟

二子皆攀桂一生唯好吟夜臺如得句泉路孰知音

飲態思顏玉交情失斷金奠芻何以報折盡老夫心

鄒宣德挽詞二首

憶昔姑溪上分携歲月賒清標冰有骨靜德玉無瑕
不殺居為戒傳經大厥家西山問仙籍公合在煙霞
靜樂疇能匹脩然几杖間有兒專使節無念落塵寰
流水歸何處孤雲去不還成仙應蛻骨誰謂掩泉關

哭漳州蔡溫老秀才

交遊氣槩如君少患難扶持及我多萬里相思魂往
返一書報死淚滂沱文場決策終難必旅館捐軀可
奈何猶得有兒傳素業幾時歸葬舊山坡

楊次公侍講挽詞二首

力學窺前古扶經翊太平樂成天地格桃正祖宗明
知命窮猶達趨玄死亦生世無班馬筆誰為勒幽銘
孤進終難達文章誤此生纔趨王府講已夢玉樓成
遺篋書千卷招魂酒一觥空餘淮上月不到夜臺明

楊次思博士挽詞

有志吞戎虜成書達帝庭長江傾學術短炬速年齡
玉樹埋蒿壤泉臺掩夜局功勳何可問不得上丹青

亡友留君儀挽詞二首

信報君儀訃將如吾道何交遊亡玉樹涕淚瀉金波
三子先凋泯一身纏病痾人生誰不死遺恨獨君多
壯子皆先隕親喪未啓攢病成終不愈魂散若爲安
結義從今泯遺編忍復看亭開基石處雲水想漫漫

吊故友吳延之屯田

吳老歸泉後人間未有君春深耒陽草月亂采江雲
孤嘯猿求侶哀鳴鴈失群姑溪一樽酒遥酌五峯墳

哭亡友李公達

忽得凶音淚不收可憐英氣墮荒幽天垂北斗夜臺
靜虎嘯西風墳樹愁學道未行嘗自信高名雖在復
何求謾携一榼招魂酒獨對脩江想獻酬

吊黃塘寺知白上人

今日黃塘寺昔年知白師悟禪兼悟律能畫亦能詩
舊卷春涵暝新墳月掩悲餘生我何有騎馬送衰遲

吊亡友袁世弼太博

自掩斯人骨西山秀色低文章蘄早悟壽夭理難齊
絕壑沈寒玉空江沒斷霓兒孫今賣宅感舊只酸嘶

三二詩

榮翁周詢仲謨苦於學腹實五車書尤明禮樂事畫就百

幅圖獻之神宗朝不報還舊廬白頭着青衫老憤猶

欲舒佐邑曾未赴瞑目忽已殂何子敏中仲文稍家富恬

不為利拘執筆工詞章科第學有餘終遭有司黜才

命誠難俱今聞亦長往令我勤悲吁二家各有子素

業傳門閭登科既同籍奔喪又同途李君洙聖源出世

胄軒軒珮瓊琚計偕冠多士場屋喧名譽晚乃樂高

隱賣藥荒村墟愈貧愈自信純潔不可汙天胡奪其

齡否極泰則無斯人皆舊遊想望空踟躕顧我雖未

死目眊霜盈鬚近酒已先惡趨時迹尤踈飛章乞殘

骸輕舟下重湖將投永安泊訪舊相歡娛那知死生

隔三秀同時枯欲為招魂篇悲風涕沾

擬挽歌五首

百年苦役役一死已休休惟我方自適妻子空悲愁

滿樽奠美酒滿盤薦珍羞我終不可起汝情謾悠悠

送我入蒿里寂寞無春秋

形壞影亦滅有神竟何依漠漠空木中豈知經四時

以此為長年誰人不同歸兒孫汝勿泣朋舊汝勿悲

歲月易經過冥默終相

生前勢有殊死去分始齊且將耳目靜安用親舊啼
鴻鴈任南北日月隨東西陵谷亦已變道化復何爲
于生動以擾既死靜且潛黃土假面目青草爲鬚髯
榮華春風吹憔悴秋霜霑迴嗟在世人不識此理廉
枯骨螻蟻餘空棺蔓草纏欲訴既無路欲窺不見天
休休可奈何達道乃自然

青山集卷第十九

青山集卷第二十

當塗郭

祥正字功父

五字律詩五十首

四皓

彼美四賢老高風萬古寒去逃秦鼎鑊歸識漢衣冠
翼翼羽翰就堂堂宗社安商山弊廬在還入白雲端
晚望

久客心嘗折登樓望轉迷風傾蘋葉亂雨重柳條低
未得趨金馬何當似木鷄細尋鄉國路愁聽暝鷓啼

即事

北戶風欺幌南橋水拍城柳長無嫩色鶯老有新聲
書秩看慵卷茶甌不厭擎故園何日返此地獨含情

幽居

春晚堪行樂幽居獨閉門忘形付詩酒吾道委乾坤
壞壁蝸涎亂殘經鼠跡翻交遊今已絕孤坐欲何言

江亭

江亭孤坐久野望眼偏明映日浮雲薄搖風細柳輕
出牆新笋熟拍岸晚潮生遣僕沽春酒幽歡取次成

遣意

髮爲煙嵐禿愁因患難添徑荒無過客筍迸任穿簷

啁雀誰能遣鷺鳥不用占有巾堪漉酒聊欲效陶潛

春水

春水碧泱泱平堤映綠楊田疇資灌溉鷗鳥共徜徉
放餌愁空掣浮杯興最長晚風吹細浪仍送落英香

早起

客愁偏早起衰病愜晴明索酒防春瘴披衣聽鳥聲
舊書慵檢閱新客懶逢迎何日籠樊啓再歸溪上耕

初夜

初月未成魄瘴天雲霧低浦昏舩競入林密鳥爭栖
褊性憐幽獨香醪自挈携布衾今夜冷猶得避兒啼

可惜

可惜花飛盡春歸客未歸艱難行路險老大賞心稀
翰墨誰曾問漁樵與願違江干空駐目藜杖得相依
客禁

客禁何時釋驚魂夢裏歸深憂隣虎穴那得並魚磯
草色欣欣茂螢光箇箇微殘生苦多難搔首掩荆扉

卧柳

冉冉碧濠邊三株細柳眠根欹元着水葉大鎮藏煙
不作棟梁用豈憂斤斧先春風任飄泊客意亦留連

水漲

山雨連朝注溪流沒草亭蛟鼉方汹汹鴻鵠自冥冥
只恐翻河漢終當見日星波瀾平地作嗟嘆未曾經

水花

水畔花饒笑歌枝映小亭日光烘欲醉江色冷還醒
淺白渾迷鷺殘紅尚襯萍幽人頗蕭索此地要頻經

西齋二首

西齋吾所構簷角頗依林蕭蕭洒松篁影暄和燕雀音
青春那肯住白髮任相侵稍悟淵明樂時時撫素琴
西齋吾所愛一徑綠蘿深終日聽新鳥令人忘故林
地偏無客到山潤有苔侵禍患須安命優游不廢吟

南樓

兀坐南樓夜攔竿俯列星村遙喧瓦鼓塔近震金鈴
濕草埋昏瘴飛蟲接小螢物生皆有理吾亦委頽齡

自貽

自恨心肝拙題詩愈不工癡迷循磨蟻辛苦打窓蟲
妙道知何補多言自取窮不如長寂默塊爾白頭翁

溪岸

溪岸逢春暮柔條儘意攀輕鷗翔近渚好鳥響空山
小艇長歌側孤雲自往還遠遊成底事白首憶鄉關

要客

要客來何晚重乾漉酒中玉琴虛別操藤榻恐流塵
山暗蕭蕭雨花辭短短春杖藜慵緩步愁殺獨遊人

城南

淡沲城南路參差柳絆煙稻秧纔一寸蠶子始三眠
曲折藏花地暄和載酒天清江深有興只欲解歸船

夜興

日沒草堂陰收書復掛琴閉門人跡絕危坐客愁深
星漢光鋳動湖山氣象沉常娥如借月蚊蚋莫相侵

夕陽

夕陽沉谷口海水接天南歸鳥自成陣暝山如半酣

看雲貪負仰面移杖忽遺簪幽獨誰相過人情老始語
遷居

殊方留滯客遷館避諠譁破榻依寒竹踈窓對晚花
燕歸疑識面鳥噪默懷家囊橐無書卷新愁有五車

交遊

一作閩南客幽憂忽過春交遊半鄉相蹤跡自埃塵
未附垂天翼空成涸轍鱗吾廬松菊在悵望熟溪濱

微寒

廣潦生寒夜幽人獨倚樓渚涯迷海若燈火想漁舟
雷鼓蛙爭響雲天月暗流未應時序變初夏返如秋

旅食

旋煮青芹滑新炊白稻香僧居同淡泊旅食幸康強
未擬沈湘水深防死耒陽上書終自達聖世本虞唐

客問

來時麥未吐今見秀盈畦投竄還遭石登雲孰有梯
爾讒徒似錦吾醉只如泥行止無勞問空山杜宇啼

廢閣

疊甃基猶在排空閣已摧燕愁尋舊棟蟻蠹傍新苔
月色閑圓缺風聲自去來廢興何可問劫火亦成灰

松風

夜寂松風度魂清客枕寒琴聲傳不盡詩句寫應難
驟雨傾瑤砌真珠落玉盤隱居如可訪吾欲跨翔鸞

揮扇

四月長汀郭晴多暑氣濃欲眠難藉草選蔭必依松
綠水遙思濯青雲底處逢西巖殘照盡揮扇待踈鍾

寓館

一徑松陰合重門院落深客來聽鵲喜春過惜鶯吟
風月時經檻塵埃不到襟黃庭看在手白雪任盈簪

松檻

婆娑松與檻夾徑碧濛濛未辨雪霜操同霑雨露功

低枝翻翠蓋垂葉密樊籠它日爲梁柱掄材合至公
立夏

歲旦辭江國炎天客瘴鄉浴陂群鳥白含霧野梅黃
恨別山隨眼消愁酒滿觴殘魂終易斷回首只茫茫

深夜

四天垂翠碧一水湛星辰寂寞殊方夜漂流片葉深
帝鄉勞夢想客路只風塵鐘鼓還催曉深慙釣渭濱

競渡

競渡傳風俗旁觀亦壯哉棹爭飛鳥疾標奪彩龍回
江影渾翻錦歌聲遠震雷輕生一餉樂時序密相催

傷春二首

臘月花開盡中春不見花柳陰空拂地草色漫平沙
客路心常折僧窓鬢自華故鄉何處是瘴海暗天涯
春雨時時暗春花眼未經生涯隨過鳥世態委浮萍
瘴霧何由避蠻歌不忍聽誰家有醇酎吾欲醉兼醒

西池

雨漲西池水微瀾拍畫橋不愁蓮芡沒唯恐棟梁漂
扶杖防危步移床避晚潮何當風日爽一舞看纖腰

積潦

積潦連江海春撞銳劍鋒郡城千丈折民食五年凶

雨脚懸麻直雲頭潑墨濃忘機唯白鳥不解避蛟龍
自笑

自笑姑溪客還投瘴海邊不才無進路多病復殘年
欲種千竿竹將求二頃田人生底事足且愛酒涓涓

喜晴

瘴鄉仍久雨生事念樵漁江海雲歸盡乾坤日上初
短垣張澣服幽圃理殘蔬佐國知無術聊欣病體舒

城上

危步欲何適城頭獨杖藜水歸滄海後雲散暮天時
秋色長空淡笳聲迥野悲泥沙埋熟稻一穗亦無遺

獨醒

野性惟怜酒無聊遂獨醒風塵雙白鬚天地一青萍
鵬鳥寧須賦離騷未是經回頭付陳迹終欲醉冥冥

邸報

立法新三省論材只數公簿書期會正風俗見聞同
戎狄瘡痍後朝廷氣槩中不才思獻賦天路恐難通

宦情

宦情聊落甚況在九溪邊瘴霧易成雨颶風偏覆船
水殘餘盜賊村迥少人煙欲達中州信迢迢路六千

自遣

骨相殊屯賤無官只有階平生萍梗過兩鬢雪霜排
去國腸空斷求田心未諧新交莫相笑中立一枝柴

西庵

一庵丹荔下更與畫橋隣不許塵埃到每期風月親
好音聞度鳥斜影辨踈筠拂拭白藤榻欹眠穩病身

雨過

雨過添幽事褰裳步暖沙竹梢含淨霧藤刺冒輕槎
鷓鴣雙隨浪蜻蜓對覓花老夫詩思愜頗覺日沉車

野寺

野寺盤山腹高秋雨霽天拂簷雲漫漫穿竹水涓涓

接食憐馴鳥
樁筇慕老禪
經年無客到
門巷疊青錢

青山集卷第二十

[Faint bleed-through text from the reverse side of the page, including characters like 五、無、以、為、固、然、也、日、故、于、張、夫、也]



